

求恕齋
叢書

四庫全書表文箋釋

四

四庫全書表文箋釋卷四

茂名林鶴年纂

吳興劉承幹校

凡茲

獨斷咸稟

睿裁

申子曰獨視者謂明獨聽者謂聰能獨斷者故可

以爲天下主○按此總言凡纂修經史子集諸書去取褒貶一皆懷遵 聖斷自此至敘稱校上一段言旣經 純廟鑒定其編次永樂大典中之書及編次各省進到之書皆就繕錄呈覽

懿此同情實孚公義

漢書吳王濞傳曰同惡相助同好相留同情相求同欲相趨同利相死韓非子曰令必行禁必止人主之公義也○按此言採錄棄取之公

苞千齡而建極道出於

天

晉書禮樂志曰創千齡之英範尙書洪範曰次五
曰建用皇極漢書董仲舒傳曰道之大原出於天
詳見上道命天原條

綜百氏以歸型言衷諸

聖

漢書敘傳曰總百氏贊篇章揚子法言吾子篇曰

萬物紛錯則懸諸天眾言淆亂則折諸聖○按此
言薈萃自古諸家之說以定一是恭讀 御製詩
四集卷十七新正含經室末一二聯有諸家執臆說
誠夥一室操戈理則那刪駁折中信非易吾方勉
此敢延俄之句注曰近命詞臣校勘四庫全書每
取原書披閱或繕寫進呈見其中有義解踳雜紀
載失實輒爲題識辨論書之簡端亦有舉其譌舛
處諭諸臣隨時訂正者

權衡筆削事通乎春賞秋刑

申子曰君必有明法正義若懸權衡以稱輕重所以一羣臣也史記孔子世家曰至於筆則筆削則削游夏之徒不能贊一辭左襄二十六年傳曰古之治民者勸賞而畏刑恤民不倦賞以春夏刑以秋冬

絜度方圓法本乎

乾規坤矩

禮記大學曰是以君子有絜矩之道孟子曰規矩

方圓之至也晉書阮種傳曰哲王承天之敘光宅
宇宙咸用規矩乾坤惠康庶類○按此聯總言褒
貶去取一本 欽定

是以儀璘懸耀揆景鳬趨

老子黃庭經曰鬱儀結璘善相保又七聖記曰鬱
儀赤文與日同居結璘黃文與月同居皆日月之
精也文心雕龍章表篇曰其在器式揆景曰表蘇
武與李陵書曰乘雲附景不足譬速晨鳬失羣不
足喻疾

鏞機先鳴聆音屬集

余正釋樂曰大鐘謂之鏞其中謂之剽小者謂之
機陸雲贈顧彥先詩曰瞻儀情感聆音心悲本草
釋名曰麌喜聚散故又名麌○按此聯言纂修諸
臣辨時待漏入直

鯨鐘方警啟蓬館以晨登

西都賦發鯨魚鏗華鐘注曰海中大魚曰鯨有獸
名蒲牢素畏鯨一擊則大鳴華嶠後漢書曰學者

稱東觀爲老氏藏室道家蓬萊山故稱蓬觀南史
崔祖思傳曰武帝卽位祖思啟陳政事云宜察朝
士有柴車蓬館高以殊等嵇康詩曰晨登箕山巔
日夕不知饑

鶴籥嚴關焚蘭膏以夜繼

江總爲陳六宮謝表曰鶴籥晨啟雀釵曉映周易
鄭注曰齊魯之間名門戶及藏器之管曰籥楚詞
招魂曰蘭膏明燭華燈錯些王逸注曰蘭膏以蘭
香煉膏也韓愈進學解曰焚膏油以繼晷恒兀兀

以窮年○按此聯言纂修處晨夕功程

披文計數甯止於萬七千篇

文賦曰碑披文以相質誅纏綿以悽愴管子七法
篇曰剛柔也輕重也大小也虛實也遠近也多少
也謂之計數隋書經籍志曰煬帝好讀書著述自
爲揚州總管置王府學士至百人常令修撰前後
近二十載修撰未嘗暫停自經術文章兵農地理
醫卜釋道及至捕逐鷹狗皆爲新書無不精治共
成三十一部萬七千卷○按此言成書之多應繕

寫者十六萬八千卷

按月程功務得夫四十五日

禮記儒行曰程功積事推賢而進達之漢書食貨志曰冬婦人同巷相從夜績女工一月得四十五日服虔注曰一月之中又得夜半十五日凡四十五日也○按此言纂修之勤

裁縫無迹先成綴白之裘

杜甫白絲行詩曰美人細意熨貼平裁縫減盡鍼

線迹淮南子說山訓曰天下無粹白之狐而有粹
白之裘緩之眾白也○按淮南子說與呂氏春秋
略同此言先編輯永樂大典中之書

傳寫相爭齊炙汗青之竹

晉書左思傳曰思三都賦成豪富之家競相傳寫
洛陽爲之紙貴劉向別錄曰殺青者以火炙簡令
汗取其青易書復不蠹謂之殺青亦謂汗簡唐書
劉知幾傳曰故頭白可期而汗青無日○按此言
繕寫永樂大典中之書

架羅黃卷積盈有似於添籌

唐書天寶四載十一月敕御史依舊置黃卷書缺失又宋祁筆記曰古人寫書盡用黃紙故謂之黃卷程大昌演繁露曰古書皆卷至唐始爲策子今書冊也積案盈箱已詳見上東坡志林曰嘗有三老人相遇或問之年一人曰吾年不可紀但憶少年時與盤古有舊一人曰海水變桑田時吾輒下一籌爾來吾籌已滿十閒屋一人曰吾所食蟠桃棄其核於崑崙山之下今已與崑崙齊矣○按此

言編纂各省進到之書

凡擁烏皮刊謬時防其掃葉

晉皇甫謐高士傳曰晉宋明不仕杜門注黃老孫
登惠烏羔皮裏几晉書齊獻王攸傳曰攸就人借
書必手刊其謬然後反之鮑彪戰國策敘曰校書
如塵埃風葉隨掃隨有○按此言校勘繕寫已成
之書

畢昇活板漸看字是排成

夢溪筆談曰慶曆中有布衣畢昇始爲活板其法用膠泥刻字薄如錢脣每字爲一印火燒令堅先設一鐵板其上以松脂蠟和紙灰之類冒之欲印則以一鐵範置鐵板上乃密布字印滿鐵範爲一板持就火煬之藥稍鎔以一平板按其面則字平如砥○按後世活字排印之法以宋畢昇爲鼻祖此述乾隆三十九年武英殿刻製聚珍木字活板大小單字計二十五萬餘先排印通行之書三十餘種比埏泥鎔鉛尤爲工緻以活字板名不雅馴經蒙 欽定嘉名爲 武英殿聚珍板恭讀 御

製詩四集卷二十二題十韻曰稽古搜四庫於今
突五車開鑄思壽世積板或充閭張帖唐院集周
文梁代餘同爲製活字用以印全書精越鶴冠體
富過鄴架儲機圓省雕氏功倍謝鈔胥聯腋事堪
例埏泥法似疏毀銅昔悔彼刊木此慙予旣復羨
梨棗還教慎魯魚成篇示來學嘉惠志符初

曾鞏官書已見序稱校上

宋曾鞏字子固南豐人奉勅刊定官本書每書俱
製序文又南豐集載新序目錄序及說苑目錄序

等書序末俱有編校書籍臣曾鞏上云云○按此指編次纂成之書用活字板印刷先行進呈當時纂修四庫全書總目首列提要卽仿南豐目錄序例序末俱注某年某月恭校上臣某某字樣

加以

乾行至健

七旬之念典彌勤